



iAhuiluy! Hanaq Pachapin kachkani,
wamanikunapa, resisqa mana resisqa apu
suyukanapa hanaq pachanpi.
iMaytaq kay! Runan Dios, Diosmi runa.
Kayqaya Pacha muyuq apu mayukuna arañapa aswan llañu llikan hinallaña,
mana imapas kankumanchu hina mastarikunku.
Diosmi runa.

¿Maytaq kuntur, maytaq waman?
As raprayuq urukunawan kуска chinkanku, wayrapichus, icha imapichus.

Dios Yaya, Dios Churi, Dios Espíritu Santo, manañan kankichikñachu;
Hanaq Pachapin kachkani,
nina wasanpi, qasilla, imay mana tiyaspa;
fierro nina, yuraq mancharay runapa ruwasqan wayra chawapi.
Arí. "Yetmi" sutin.

Manan llapallan mayukunapa, hatun la mar qocha challwankunapa qorin
kay "Yet" hina rauranmanchu.

Chay manchachiq riti kauchinkuna, taqsalla qollqe hinalla, ura uraypi,
asllata llipipichkan chullunkallay hina.

Runan Dios. Runan kani; runan kay manaña yupay atina wayanay wayra
challwata ruwan.

Gracias taytay, runa. Diospa mana churin, taytan.

Dios runa: amayá wilkka yawarniki paqcharinpaq kay illa wayanay chawata
kuyuchiychu.

iInfierno kanmi! Ama runa yanuna pachaman kay apukunapa apun
pawachiychu.

Sapa punchay Dios sonqoykipi mirananpaq kachun, kay cielo qori
challwa.

"Yetpa" llampu, gloria oqllunpi, astawan qari, astawan allpa, urpi, imay
mana wayta sonqoy, uyay, makiypas;

huchaykunapas kay oqllupi wapsorun; llulluyarin sonqoy.

Taytay runa: aypanaykipaqmi Diosta ruwar qanki. ¿Icha imapaqchu?

iAypaykuchkankiñan!

Yanqataq chaupimanta chay "Yetpa" kauchinwan, ritimantapas astawan
filo kauchinwan ñawikita llikiruwat.

Ancha ninan, ancha apun, ancha mana aypanañan kay riti yuraq uripi
challwayki.

Churikitaq chiririnkasunkiman;
wallpaq makikitanta pillpintu oqarikuqtaq umayki uspaman
kutichipuman.

iYau, wauqey runa, uyariway!

Chayraq kama pachaman lloqsiq, qawariq wamanchapa hinan ñawiy,
yetpa oqllunpi;

manan manchakunichu; qoyllurkunatan aypachkan yawarniy.

iYawarniyimi qoyllur!

Ama qoyllurwan sipichikuychu,

wiña wiñay makikimanta cielo challwa, mayukunapa apun challwa
ruwasqaykiwan.

Dios Yaya, Dios Churi, Dios Espíritu Santo, Wamanikuna, Dios Inkarrí:
sonqoyimi rauran, qankunan ñoqa ñoqataqmi qankuna kani, yetpa mana
usiy kallpanpi; Hanaq Pacha Yayan Yet.

Ama allipachamuychu.

iSeqay, seqaypuni, wiñaypaq miraq pachakuna pataman chayay,
ichiruy!

Dios gloria runa,

manañan wañuwaqchu. Kamachiqniki Diosta, wañuchiqnikitin wañurachinki.

Kayqalla yet muyuchkan; tukuy apukunapa apukunan, maykamaraq
apukunapa kallpanwan kallpachasqa.